

1 TESALONIK

Kweiboug Pawl it̄avin, in Tesalonik, ikatimlakes sinapun Kelis, mo ilisawes, inoun. Wankuyeim gog mo ikayeb Timotiy, bein biguyes; ikous, mo iyum inek Pawl, ilana, “Min-Tesalonik isimounids bwein, issiwayoubs.” Mapuna Pawl ikalin nuwan, ilel silet towen, waseg ikatimlakes o iguys silmanin Yeisuw inaked.

Nakabsilamaw

1 ¹Yey Pawl sigwey Saylos son Timotiy, malet niwekeimiy min-Tesalonik yakamiy nukuyekelesiys Tamads Yowbad waseg, o daGuyaws Yeisuw Kelis waseg. Yowbad bo bisiwyoubumi, mo beitaw nuwamiy.

Min-Tesalonik asisinap bwanabwein

²⁻³Tut babaw ikalin nuwem daGuyaws waseg, peinan amisinap bwanabwein. Kaninitoug daGuyaws Yowbad waseg, kaninuweimiy, kakavvataq yigamiy, peinan nukusimounids Yeisuw waseg, o miwotet waseg sona siwayoub, o kummises vagan daGuyaws Yeisuw Kelis bikatinabweimiy. E, amisinap mawan bwanabwein, Tamads Yowbad wamatian.

⁴E sigwey, kakakin-wan Yowbad bo isiwyoobumi mapuna mo ikatigikeimiy angamag yakamiy.

⁵Kweiboug nukuliganes amalivan bwanabwein peinan nakatimlakeimiy livanen Yeisuw. Nag kukwatilutegs mav, nag. Tage Kululuwan Yowbad waseg livan towen, mapuna itawtoun wasigeis yakamiy, o yakamey singay kasimounid waseg. O nukukines amasinap igaw simayas yakamiy nitasesus, mo nukutakayasis.

⁶Abamiy singaya kalbaleb, tage Kululuwan Yowbad nilabeimiy mo kumwasaws, nukutakayasis amasinap yakamey, mawan daGuyaws bo kutakayasis, peinan anilivan bo kutimakes.

⁷Amisinap bwanabwein, mamagina sikabtakayas yakamiy, tasiyas tayekelesiys ven Masidoniy waseg, o ven Akay waseg.

⁸E, nukusimounids Yowbad waseg, bulagan amisinap bwanabwein mo inekes ven babaw gimgilis, mo iliganes livanen daGuyaws Yeisuw, tasiyas

min-Masidoni y sisiyas min-Akay. Mapuna nag ivag sivinem bakalivan bulagan misimounid, peinan bo ikakins nanawan.

⁹⁻¹⁰Tasiyas gog livneimiy isekemas yakamey, peinan kweiboug nakasap wasigeis yakamiy mo nukuliganes agem, nukupiyaves tobwag yowbad, o nukutams Yowbad mounid waseg, vagan Tamwamov Townen kukwanawes aygan, o bukukwayamats Natun tonen igaw beinoy walbalab beim. Mtownen Yeisuw, igaw kanig waseg Yowbad niyakit, mo itamanaw vayuwein vagan kid bikatinabweids. Awoum igaw Yowbad bikamtanids adsinaps kalbaleb silmanin.

Pawl nawotet ven Tesalonik waseg

2 ¹Sigwey, kuninuways kweiboug nag kawekeimiy mav, peinan anagin mawotet nakaban wasigeis yakamiy.

²Deisin-wan min-Pilipay bo iyagagemas, amamwasin, tage nag kagwey; kakapwapout-wan. DaGuyaws bo ilabem mo kadibakeimiy livanen Yowbad, vagan bukumwasaws kid. Deisin-wan gamag mwasanin isibwademas, tage bo kageiguy.

³Mageiguy waseg nag kayaweid; nag sinapun geinawl, nag. Amalivan waseg nag bakakatidaveimiy, nag.

⁴Tage peinan Yowbad itam nanon, idoki kadiloka bisekem livanen bwanabwein, mapuna kageiguy. Nag vagan gamag bikalin nuwes; nag. Tage sivinem Yowbad bikalin nuwan. Peinan Yowbad ikakin aveiyag wanuwads nises.

⁵Kuninuways amalivan; nag kateiy ninoumiy amalivan kamnag waseg; nag. Nag tayyaweid yakamey; nag. Nag amalivan kamnag vagan bakakwey mivavag; nag. Yowbad ikakin amalivan mounid.

⁶⁻⁷Nag ivag sivinem gamag bikavasimas; nag. Takinew yakamiy, o ven mwasanin gimgilis; nag. Tage bweina bakalivan aveiyag bukusekemas, peinan takaweins livanen Kelis yakamey. Nag gog, yakamey tammanum wasigeis yakamiy. Amasinap mawana vin nañan bituyes nitun, o bivnases beibwein.

⁸E, nakakalpwakit wasigeis yakamiy; sivinem kid livanen Yowbad bakasekeimiy mo bitamsamwas simayas yakamiy, peinan singay sivinem yakamiy. Atem meivak-wan nakatam pinamiy yakamiy.

⁹Sigwey, kuninuways kweiboug mawotet avakaein wamiven nakases, kawwotet iboug ee... iyam, kaem silmanin. Nakasekeimiy bwanabwein livanen Yowbad, tage awoum beivag mimouvit silmanin kaem.

¹⁰Kukwakins-wan, o Yowbad-vak ikakin, igaw simayas yakamiy nitasesus, amasinap bwanabwein, didumwal; nag kayagageimiy tayektelesiys yakamiy; nag.

¹¹⁻¹²Kuninuways nakaguyeyimiy tatanok tatanok yakamiy, mawana timamii yakamey; sivinem bakalabeimiy o bakakimtuweimiy vagan

amisinap beibwein mo bikalin nuwan Yowbad. Peinan bo ikatigikeids silmanin nakaleiwag son nakamnat.

13-14 Sigwey, tut babaw ikalin nuwem Yowbad waseg, peinan livanen Yowbad nakalivan nukuliganes, nag mamagina gamag asilivan; nag. Peinan kukwakinsa Yowbad anilivan tatonen. Nukuliganes livanen Yowbad, kulinuways mo nukusimounids waseg, Kusimounids mo nukutakayasis tasiyas tayakelesiys. E, nukutakayasis asisinap min-Yudiy tasiyas niyakelesiys Yeisuw Kelis waseg, peinan miven gimgilis bo iyagegeimiy yakamiy, mawan-vak Yudiy gimgilis niyagages Yowbad angamag tasiyas.

15-16 Min-Yudiy kweiboug neiweiys tasiyas palopits, wankuyeim-vak daGuyaws Yeisuw neiweiys. Wankuyeim mo ikayabemas yakamey. Yowbad igeg nanon wasigeis min-Yudiy tasiyas, peinan tasilabods. E, sivines bisilbwadem; mata ge bakasekeimiy livanen Yeisuw, tobwag ven gimgilis yakamiy, mo Yowbad bikatinabweimiy. Singay ikatimweis asisinap kalbaleb mo ivakaein. Nakabiyokous waseg, Yowbad ankavikun mo ilivatus tasiyas.

Pawl sivinan vayuwein binekes tasiyas

17 Sigwey, nakalisaweimiy tut kadiyakus waseg, tage nuwaneimiy singaya wasigeis yakamey nises. Sivinem kid vayuwein bakaw kalakwaneimiy.

18 Yey Pawl tut babaw ayyokon, bo nag. Peinan Seitan bo isilbwed maked.

19-20 Nuwaneimiy singaya wasigeis yakamey nises. Igaw daGuyaws Yeisuw beiyum beim, nag kalisiy wasigeis bakamwasaw; misinaka yakamiy. E, kannamis vagan igaw avei-tut Yeisuw beiyum beim, mo beimwan wom wasigeis yakamiy.

3 1-2 Singaya nuwaneimiy, kawnamat waseg, kalana, "Kadiloka Timotiy takayabes binekes. Bweina aditeiy bitases Atens." Mtownen Timotiy neiw, bwadads mtownen; simey kakanow aygan Yowbad, kageiguy bwanabwein livanen Kelis. Nakakayeb Timotiy neiw vagan bikimtuweimiy bukutawtouns o bukusimounids beibwein Kelis waseg.

3 Deisina gamag bo iyagegeimiy, tage Timotiy beiw biguyeimiy; mata ge bukukwalouws. Kukwakinsa tut towen bo bigeg abads.

4 Kweiboug wamiven nitasesus simayas yakamiy, nakalivan kalana, "Igaw abamiy bigeg." Nagein kukines bo ikamat anagin.

5 Akakina abamiy igeg, singaya nuwaneimiy waseg yei nises. Tamawanbeitout nanoug o bakaptuleig; nag. Mapuna mo akayeb Timotiy, beiw ilakwaneimiy, vagan bulagan misimounid bimey bidibakeig. Peinan agupwayat waseg mtownen takatsilakay; adoki bikatsilakeimiy mo biyageg gunawotet wasigeis yakamiy.

⁶ Misiyamun Timotiy neiw, neiyum gog neim, mo imey bulgamiy ilana, “Min-Tesalonik tasiwayoubs, isimounids bwein waseg daGuyaws, tut babaw ininuweids-wan, sivines kid bukunekes bukulakwanes.” Yakamey-vak ninom bo mawan-wan, sivinem bakawekeimiy bakalakwaneimiy.

⁷ Kaligen bulgamiy yakamiy, mo itout ninom. Tage abem bo igeg, tage deisa kamwasaw-wan, peinan nukusimounids daGuyaws waseg.

⁸ Kukin bukutoukums waseg mo beimwan wom.

⁹ Ta-mawan bakavkek bakayakawn Yowbad waseg, mamwasaw singay avakaein wamatatan Yowbad pinamiy yakamiy.

¹⁰ Yam babaw o boug babaw singaya kaninitoug pinamiy yakamiy, kalana, “O Guyaw, sivinem bakakin migis tasiyas. Kukin nag isimounids bwein, bakakintuwes mo bitawtouns.”

¹¹ Sivinag Tamads Yowbad son daGuyaws Yeisuw bikaliyow gunaked mo baw.

¹² Anitoug waseg, alana, “Kwatinweis sisiwayoub bivakaein wasigeis sisiyas, o wasigeis gamag meivek-wan, mawana yakamey masiwayoub wasigeis tasiyas.

¹³ “Igaw maGuyaw Yeisuw beiyum beim siney tasiyas angamag minibalab, mo tasiyas bitamanaws wamatam yakkoum, Yowbad Timem, sona ates gimagim-nen, asisinap tawtoun, kamnat.” Gunanitoug pinamiy yakamiy mawan.

Adsinaps beibwein mo bikalin nuwan Yowbad

4 ¹ Sigwey, kweitan livan-vak nises, waseg baguyeimiy daGuyaws Yeisuw peinan. Kweiboug nakakatimlakeimiy mo kukwakins amisinap bwanabwein, waseg Yowbad ikalin nuwan. Nagein amisinap mawan, tage kadiloka kwatimweisis amisinap bwanabwein bivakaein.

²⁻³ Kukwakins-wan daGuyaws Yeisuw nakaleiwag bo nakasekeimiy. Peinan Yowbad sivinan bikayuseimiy silmanin veivay mounid. Awoum kwaninavaysa mav; awoum.

⁴ Tatanok tatanok yakamiy kadiloka bukuninuways veivay mounid, amisinap kamnat waseg mo bukuvays.

⁵ Vikeyi awoum bikalawageimiy mo bukugeinawls mawana tasiyas tadarubs, peinan nag ikakins Yowbad.

⁶ Awoum teitan yakamiy bigeinawl mo biyageg son nakaveivay. DaGuyaws mo bimop asisinap tasiyas takalbalebs. Kweiboug bo kakatiboug nuwamiy, mageiguy tawtoun waseg.

⁷ Yowbad nag ikatigikeids makava kanavay silmanin, nag; tage silmanin sinap kamnat.

⁸ Kaleiwag towen nag teitan gamag nakaleiwag, tage Yowbad nakaleiwag. Mata ge bukusiplaves, peinan tavganein Kululuwan Bwanabwein.

⁹ Awoum livanen siwayoub balel vagan bukusiwyoubus simiyas, peinan Yowbad bo ikatimlakeimiy. Nanawana bo kukwakins.

¹⁰ Nukusiwyoubus tasiyas tayekelesiys babaw ven avakaein Masidoniy waseg. Kaguyeimiy vagan kwatimweisis misiwayoub bivakaein.

¹¹ Kadiloka bukuyokons vagan bukusesus niwal waseg. Amisinap tatineimiy kulinuways. Awoum kwatpunugis simiyas, vagan miwotet tatineimiy bukuwteles. Kweiboug nadibakeimiy mawan.

¹² Awoum bukumlavags mawan tabgumat yakamiy; igaw mo bukunekes simiyas bukusibukways kaeis bisekeimiy bukukwams kid. Bukuvages mawan, tasiyas nag iyeklesiys bikineimiy mo bikayuweimiy. Awoum!

DaGuyaws beiyum beim

¹³ Sigwey, awoum bukutagouwaws silmanin tasiyas takankanigs. Babaw gamag nag isimounids beikits vayuwein, mapuna ninous singaya moumouvit kanig waseg. Tage yakamiy awoum beivag ninoumiy mawan.

¹⁴ Tasimounids peinan Yeisuw ikanig mo ikit vayuwein. Tasiyas-vak Yeisuw angamag nikankanigs, Yowbad mo biyakitus, bitokes bimeyes sisiy Yeisuw.

¹⁵ Mounid daGuyaws anilivan kadibakeimiy, kokin son mwamovads bitasesus, igaw daGuyaws beiyum beim, tasiyas kweiboug nikankanigs mo bimgwayeids. Yakids nag bitamgwayes tasiyas; nag.

¹⁶⁻¹⁷ DaGuyaws gog beiwak, tasiyas anelos sitovek-vak beiwak, bwagig-nen libalab biyikis, daGuyaws beibus beim, mo tasiyas nikanigs Yeisuw waseg wanmugwana beikits, wankyeim mo yakids tamwamovs yakids. Sidayas tasiyas mo bikaweids bitaneis wanakaew, mo bitanekes daGuyaws lov wanuwan, sods mtowen mo bitasesus bitasigagas.

¹⁸ Sinap towen waseg kugeiguis simiyas wasigeis vagan amnamiy beibwein.

5 ¹ Sigwey, nag kadilok balel sinap vagan bukukwakins avei-tut nakabiyokous ven watinow, peinan nanawana bo kukwakins.

² Bo kukwakins bwein tutan daGuyaws beiyum beim mo bilabuboleids mawan tavveinaw watapwan boug bisap.

³ Gamag bilivans, bilansa, “Tut towen tasesusa bwein,” simouvit gog waseg nuwanaw mo bisiblutes biyagages, mawan gidaged bisiblutes vinay igaw bitapouy nimes. Ta-mawan bivkakes.

⁴ Sigwey, nag mamagina tadaubs yakamiy, yam towen nag bilabuboleimiy mawan tavveinaw; nag.

⁵ Yakamiy kamnat gimgeilin yakamiy; peinan nag dadub gimgeilin yakids. Wudayam waseg bitanoun.

⁶ Awoum bitammasis mawan gamag mwasanin; tage kadiloka bitalalals vagan nanouds bidumwal.

7 Tasiyas gog tammasis boug waseg immasis, o tasiyas tamwamoums boug waseg imwamoums, ikabalaweweins.

8 Tage yakids tanounas wudayam waseg, kadiloka nanouds bidumwal, mo bitasimounids o bitasiwayoubs beibwein, kululuwads ankawlawal silmanin; o bitanmises Yowbad vagan bikatinabweids, nanouds ankawlawal silmanin.

9 Peinan Yowbad nakaleiwag, awoum bikamtanids; tage Yowbad nikatigikeids vagan bikatinabweids daGuyaws Yeisuw Kelis waseg.

10 Yeisuw bo ikanig peinads yakids, sivinan kid siney yakids bitamwamovs, takinew bitasesus ven watinow, o takinew bitakanigs.

11 Mapuna kuguyes vagan bukwatimweisim simiyas sinap bwein waseg, mawana tut towen nukuvvages.

Nakabiyokous anilivan

12 Sigwey, kadiloka bukuvnases tasiyas mitamumugwas, peinan igeiguis wasigeis yakamiy, daGuyaws inawotet silmanin.

13 Kadiloka bukugoulus tasiyas, siwayoub waseg, peinan siwotet bwanabwein. Kadiloka niwal waninoumiy bises.

14 Sigwey, kadiloka bukuguyes tasiyas tabgumats. Kukimtuwes tasiyas tawnayuws mo bitawtouns. Kulabes tasiyas kalisiy nag isimounids bwein. Kwaptuleimiy babaw gamag wasigeis.

15 Kukin kal biyagageim, awoum kumop ansinap. Bweina tut babaw bukusiwayoubs simsimiyas wasigeis, o babaw gamag wasigeis.

16 Tut babaw kummwəsaws-wan.

17 Awoum kuyeiwas nitoug waseg Yowbad.

18 Bikalin nuwamiy youd babaw silmanin. Yowbad nanon mawan, peinan Yeisuw Kelis angamag yakids.

19 Awoum kusiwmates Yowbad Kululuwan.

20-22 Awoum kupiyaves sigeiguy tasiyas palopits, tage kuninuways beibwein, mo kwatukins, sinap kalbaleb kulavewas, sinap bwanabwein kuyousis beibwein.

23 Sivinag Yowbad tonena bikatimweis kululuwamiy mo beitaw nuwamiy, peinan ikayus kululuwamiy, mwamovamiy, woumiy meivekwan, vagan bukusesus bwein, amisinap kamnat-wan, tutan daGuyaws Yeisuw Kelis mo bisap vayuwein.

24 Mtowen nikatigikeids angamag yakids bitikum, bivag wasigeis yakamiy mawana nilivan.

25 Sigwey, kadiloka bukunitougs pinem yakamey.

26 Bikalin nuwamiy, bukumulouls simiyas, peinan meivek yakamiy tayekelesiys yakamiy.

27 DaGuyaws yagan waseg adibakeimiy, kadiloka bukuvinis let towen, tayekelesiys babaw biliganes.

28 DaGuyaws Yeisuw Kelis bisiwyoubumi.

Yey Pawl.